


Special

Puente Boca 'i Brick

Skirbi pa: Olinda Rasmijn



Den aurora, Puente; "Boca 'i Brick" (briek)
 Cansa y abati, aña den, aña fo
 a lastra tur su largo, riba santo blanco den Boca'i Brick
 Bisiña y piscadornan a yam'e; "Boca 'i Brick".
 Pa facilita turistanan a yam'e: "Natural Bridge".

Brug a cay, cu 'n grito amargo
 Baranca lastra den "boca di brick"
 cansa di wanta sla di lama
 a plama manera patia pashuma
 "Ata otro herencia natural"
 ta duna hende di pensa
 kico ta pasa cu nos Aruba
 parse cu no tin fin na pena
 den pecho di un naturalista
 cuanto beyesa natural, mester bay

Consternacion den pueblo,
 e brug stima, pa tur cu a apreci'e
 Brug haya como regalo di Papa Dios
 a tembla, a come sla te basha den
 Nos a admir'e, nos a contempl'e
 Brug, simbolo di Aruba

Mainta trempan, e prome rayo di solo
 e fotografo naturalista, a capta,
 rayonan ta spat te den cielo
 colo oranje, cora, e regenboog completo
 Madrugadito ela gosa e furia di ola
 a sucumbi pa e beyesa desplega,
 Eynan, bou cocodek di e brug.

Naturalesa a comete un acto bochornoso
 Di kibra e brug maraviyoso.

Lama brabo, golos di nort
 B'a tumba nos orguyo
 Y kita fo'i nos e frescura di lama
 cu a pasa bou lomba dje brug
 Awor numa mi ta corda
 con e ola ta bin cu tur su fugada
 pa plama te na punta di mi pia
 Ay e holo di lama, a penetra
 te den fondo di mi curason.

Rincon di gutu y picuda
 Ey, nan a bati rabo cant' i un coral
 Cuanto piscado 'un sinta na punta di brug
 Pa ta sigur di su cumind'i lama
 Bishitantenan fasiná, prufia
 para meimei di brug
 djis pa un recuerdo numa

Lo bo haci di falta
 nunca mas lo no ta mescos
 bo ta graba den mente
 di esnan cu sa di stima y aprecia
 e Monumento Nacional.